

主编
徐生

四库全书

远方出版社

四库全书

第二卷

主编 徐 生

远方出版社

【注释】

①赵氏曰：“明堂，太山明堂，周天子东巡守，朝诸侯之处。汉时遗址尚在，人欲毁之者，盖以天子不复巡守，诸侯又不当居之也。王问当毁之乎？且止乎？”

②夫，音扶。明堂，王者所居，以出政令之所也，能行王政，则亦可以王矣，何必毁哉？

③与，平声。拏，音奴。鰥，姑顽反。胥，工可反。斃，音琼。岐，周之旧国也。九一者，井田之制也。方一里为一井，其田九百亩，中画井字。界为九区。一区之中，为田百亩。中百亩为公田，外八百亩为私田。八家各受私田百亩，而同养公田，是九分而税其一也。世禄者，先王之世，仕者之子孙皆教之，教之而成材则官之，如不足用，亦使之不失其禄。盖其先世尝有功德于民，故报之如此，忠厚之至也。关，谓道路之关。市，谓都邑之市。讥，察也。征，税也。关市之吏，察异服异言之人，而不征商贾之税也。泽，谓潞水梁，谓鱼梁。与民同利，不设禁也。拏，妻子也。恶恶止其身，不及妻子也。先王养民之政，导其妻子，使之养其老而卹其幼。不幸而有鰥、寡、孤、独之人，无父母妻子之养，则尤宜怜卹，故必以为先也。诗，《小雅·正月》之篇。胥，可也。斃，困悴貌。

④糗，音侯。橐，音拓。戢《诗》作“辑”，音集。王自以为好货，故取民无制，而不能行此王政。公刘，后稷之曾孙也，诗，《大雅·公刘》之篇。积，露积也。糗，干粮也。无底曰橐有底曰囊，皆所以盛糗粮也。戢，安集也。言思安集其人民，以光大其国家也。戚，斧也。扬，钺也。爰，于也。启行，言往迁于豳也。何有，言

◆ 四库全书

不难也。孟子言公刘之民富足如是，是公刘好货，而能推己之心以及民也。今王好货亦能如此，则其于王天下也，何难之有？

⑤大，音泰。王又言此者，好色，则心志蛊惑，用度奢侈，而不能行王政也。大王，公刘九世孙。诗，《大雅·绵》之篇也。古公，大王之本号，后乃追尊为大王也；亶父，大王名也。来朝走马，避狄人之难也。率，循也。浒，水涯也。岐下，岐山之下也。姜女，大王之妃也。胥，相也。宇，居也。旷，空也。无怨旷者，是大王好色，而能推己之心以及民也。杨氏曰：“孟子与人君言，皆所以扩充其善心而格其非心，不止就事论事。若使为人臣者论事每如此，岂不能尧舜其君乎？”愚谓此篇自首章至此，大意皆同。盖钟鼓、苑囿、游观之乐，与夫好勇、好货、好色之心，皆天理之所有，而人情之所不能无者。然天理人欲，同行异情。循理而公于天下者，圣人之所以尽其性也；纵欲而私于一己者，众人之所以灭其天也。二者之间，不能以发，而其是非得失之归，相去远矣。故孟子因时君之问，而剖析于几微之际，皆所以遏人欲而存天理。其法似疏而实密，其事似易而实难。学者以身体之，则有以识其非曲学阿世之言，而知所以克己复礼之端矣。

【原文】

孟子谓齐宣王曰：“王之臣，有托其妻子于其友，而之楚游者。比其反也，则冻饿其妻子，则如之何？”王曰：“弃之。”^①曰：“士师不能治士，则如之何？”王曰：“已之。”^②曰：“四境之内不治，则如之何？”王顾左右而言他。^③

【注释】

①比，必二反。托，寄也。比，及也。弃，绝也。

②士师，狱官也，其属有乡士、遂士之官，士师皆当治之。已，罢去也。

③治，去声。孟子将问此，而先设上二事以发之，及此而王不能答也。其惮于自责，耻于下问如此。不足与有为可知矣。赵氏曰：“言君臣上下，各勤其任，无堕其职，乃安其身。”

【原文】

孟子见齐宣王，曰：“所谓故国者，非谓有乔木之谓也，有世臣之谓也。王无亲臣矣，昔者所进，今日不知其亡也。”^①王曰：“吾何以识其不才而舍之？”^②曰：“国君进贤，如不得已，将使卑踰尊，疏踰戚，可不慎与？”^③左右皆曰贤，未可也；诸大夫皆曰贤，未可也；国人皆曰贤，然后察之，见贤焉，然后用之。左右皆曰不可，勿听；诸大夫皆曰不可，勿听；国人皆曰不可，然后察之，见不可焉，然后去之。^④左右皆曰可杀，勿听；诸大夫皆曰可杀，勿听；国人皆曰可杀，然后察之，见可杀焉，然后杀之。故曰，国人杀之也。^⑤如此，然后可以为民父母。”^⑥

【注释】

①世臣，累世勋旧之臣，与国同体戚者也。亲臣，君所亲信之臣，与君同体戚者也。此言乔木、世臣，皆故国所宜有。然所以为故国者，则在此而不在彼也。昨日所进用之人，今日有亡去而不知者，则无亲臣矣，况世臣乎？

②舍，上声。王意以为此亡去者，皆不才之人。我初不知而误

用之，故今不以其去为意耳，因问何以先识其不才而舍之邪？

③与，平声。如不得已，言谨之至也。盖尊尊、亲亲，礼之常也。然或尊者、亲者未必贤，则必进疏远之贤而用之，是使卑者踰尊，疏者踰戚，非礼之常，故不可不谨也。

④去，上声。左右近臣，其言固未可信。诸大夫之言，宜可信矣，然犹恐其蔽于私也。至于国人，则其论公矣，然犹必察之者，盖人有同俗而为众所悦者，亦有特立而为俗所憎者，故必自察之，而亲见其贤否之实，然后从而用舍之，则于贤者知之深，任之重，而不才者不得以幸进矣。所谓进贤如不得已者如此。

⑤此言非独以此进退人才，至于用刑，亦以此道，盖所谓天命天讨，皆非人君之所得私也。

⑥传曰：“民之所好，好之；民之所恶，恶之：此之谓民之父母。”

【原文】

齐宣王问曰：“汤放桀，武王伐纣，有诸？”孟子对曰：“于传有之。”^①曰：“臣弑其君，可乎？”^②曰：“贼仁者谓之贼，贼义者谓之残。残贼之人，谓之一夫。闻诛一夫纣矣，未闻弑君也。”^③

【注释】

①传，直恋反。放，置也。《书》云：“成汤放桀于南巢。”

②桀、纣，天子。汤、武，诸侯。

③贼，害也。残，伤也。害仁者，凶暴淫虐，灭绝天理，故谓之贼；害义者，颠倒错乱，伤败彝伦，故谓之残。一夫，言众叛亲离，不复以为君也。《书》曰：“独夫纣。”盖四海归之，则为天子；

天下叛之，则为独夫。所以深警齐王，垂戒后世也。王勉曰：“斯言也，惟在下者有汤、武之仁，而在上者有桀、纣之暴，则可。不然，是未免于篡弑之罪也。”

【原文】

孟子见齐宣王，曰：“为巨室，则必使工师求大木。工师得大木，则王喜，以为能胜其任也。匠人斲而小之，则王怒，以为不胜其任矣。夫人幼而学之，壮而欲行之。王曰：‘姑舍女所学而从我’，则何如？^①今有璞玉于此，虽万镒，必使玉人雕琢之。至于治国家，则曰：‘姑舍女所学而从我’，则何以异于教玉人雕琢玉哉？”^②

【注释】

①胜，平声。夫，音扶。舍，上声。女，音汝。下同。巨室，大官也。工师，匠人之长。匠人，众工人也。姑，且也。言贤人所学者大，而王欲小之也。

②镒，音溢。璞，玉之在石中者。镒，二十两也。玉人，玉工也。不敢自治而付之能者，爱之甚也。治国家则徇私欲而不任贤，是爱国家不如爱玉也。范氏曰：“古之贤者，常患人君不能行其所学；而世之庸君，亦常患贤者不能从其所好。是以君臣相遇，自古以为难。孔孟终身而不遇，盖以此耳。”

【原文】

齐人伐燕，胜之。^①宣王问曰：“或谓寡人勿取，或谓寡人取之。以万乘之国，伐万乘之国，五旬而举之，人力不至于此。不取，必有天殃，取之何如？”^②孟子对曰：“取之而燕民悦，则取之；古之人有行之者，武王是也。取之而燕民不悦，则勿取；古之人有行之者，

文王是也。^③以万乘之国，伐万乘之国，箪食壶浆，以迎王师，岂有他哉？避水火也。如水益深，如火益热，亦运而已矣。”^④

【注释】

①按《史记》，燕王哙让国于其相子之，而国大乱。齐因伐之，燕士卒不战，城门不闭，遂大胜燕。

②乘，去声，下同。以伐燕为宣王事，与《史记》诸书不同，已见《序说》。

③商纣之世，文王三分天下有其二，以服事殷。至武王十三年，乃伐纣而有天下。张子曰：“此事间不容发。一日之间，天命未绝，则是君臣；当日命绝，则为独夫。然命之绝否，何以知之？人情而已。诸侯不期而会者八百，武王安得而止之哉？”

④箪，音丹。食，音嗣。箪，竹器。食，饭也。运，转也。言齐若更为暴虐，则民将转而望救于他人矣。赵氏曰：“征伐之道，当顺民心。民心悦，则天意得矣。”

【原文】

齐人伐燕，取之。诸侯将谋救燕，宣王曰：“诸侯多谋伐寡人者，何以待之？”孟子对曰：“臣闻七十里为政于天下者，汤是也，未闻以千里畏人者也。《书》曰：‘汤一征，自葛始。’天下信之。‘东面而征西夷怨，南面而征北狄怨。曰：‘奚为后我？’民望之，若大旱之望云霓也。归市者不止，耕者不变，诛其君而吊其民，若时雨降，民大悦。《书》曰：‘徯我后？后来其苏。’^①今燕虐其民，王往而征之，民以为将拯己于水火之中也，箪食壶浆，以迎王师。若杀其父兄，系累其子弟，毁其宗庙，迁其重器，如之何其可也？天下

固畏齐之强也，今又倍地而不行仁政，是动天下之兵也。^②王速出令，反其旄倪，止其重器，谋于燕众，置君而後去之，则犹可及止也。”^③

【注释】

①霓，五稽反。徯，胡礼反。两引《书》，皆《商书·仲虺之诰》文也，与今《书》文亦小异。一征，初征也。天下信之，信其志在救民，不为暴也。奚为后我，言汤何为先来征我之国也。霓，虹也，云合则雨，虹见则止。变，动也。徯，待也。后，君也。苏，复生也。他国之民，皆以汤为我君而待其来，使已得苏息也。此言汤之所以七十里而为政于天下也。

②累，力追反。拯，救也。系累，繫缚也。重器，宝器也。畏，忌也。倍地，并燕而增一倍之地也。齐之取燕，若能如汤之征葛，则燕人悦之，而齐可为政于天下矣。今乃不行仁政，而肆为残虐，则无以慰燕民之望而服诸侯之心，是以不免乎以千里而畏人也。

③旄，与耄同。倪，五稽反。反，还也，旄，老人也；倪，小儿也，谓所虏略之老小也。犹，尚也。及止，及其未发而止之也。范氏曰：“孟子事齐梁之君，论道德，则必称尧、舜；论征伐，则必称汤、武。盖治民不法尧、舜，则是为暴；行师不法汤、武，则是为乱。岂可谓吾君不能，而舍所学以徇之哉。”

【原文】

邹与鲁哄，穆公问曰：“吾有司死者三十三人，而民莫之死也。诛之则不可胜诛；不诛，则疾视其长上之死而不救，如之何则可也？”^①孟子对曰：“凶年饥岁，君之民，老弱转乎沟壑，壮者散而之四方者，几千人矣。而君之仓廩实，府库充，有司莫以告。是上慢

而残下也。曾子曰：‘戒之，戒之！出乎尔者，反乎尔者也。’夫民今而后得反之也，君无尤焉。^②君行仁政，斯民亲其上，死其长矣。”^③

【注释】

①哄，胡弄反。胜，平声。长，上声，下同。哄，斗声也。穆公，邹君也。不可胜诛，言人众不可尽诛也。长上，谓有司也。民怨其上，故疾视其死而不救死。

②几，上声。夫，音扶。转，饥饿辗转而死也。充，满也。上，谓君及有司也。尤，过也。

③君不仁而求富，是以有司知重敛而不知卹民。故君行仁政，则有司皆爱其民，而民亦爱之矣。范氏曰：“《书》曰：‘民惟邦本，本固邦宁。’有仓廩府库，所以为民也。丰年则敛之，凶年则散之。卹其饥寒，救其疾苦。是以民亲爱其上，有危难则赴救之，如子弟之卫父兄，手足之捍头目也。穆公不能反己，犹欲归罪于民，岂不误哉？”

【原文】

滕文公问曰：“滕，小国也。间于齐、楚，事齐乎？事楚乎？”^①孟子对曰：“是谋非吾所能及也。无已，则有一焉：凿斯池也，筑斯城也，与民守之，效死而民弗去，则是可为也。”

滕文公问曰：“齐人将筑薛，吾甚恐，如之何则可？”^②孟子对曰：“昔者大王居邠，狄人侵之，去之岐山之下居焉。非择而取之，不得已也。^③苟为善，后世子孙必有王者矣。君子创业垂统，为可继也。若夫成功，则天也。君如彼何哉？强为善而已矣。”^④

【注释】

①间，去声。滕，国名。

②薛，国名。近滕，齐取其地而城之。故文公以其偏己而恐也。

③邠，与豳同。邠，地名。言大王非以岐下为善，择取而居之也。详见下篇。

④夫，音扶。强，上声。创，造。统，绪也。言能为善，则如大王虽失其地，而其后世遂有天下，乃天理也。然君子造基业于前，而垂统绪于后，但能不失其正，令后世可继续而行耳。若夫成功，则岂可必乎？彼，齐也。君之力既无如之何，则但强于为善，使其可继而俟命于天耳。此章言人君但当竭力于其所当为，不可侥幸于其所难必。

【原文】

滕文公问曰：“滕，小国也，竭力以事大国，则不得免焉，如之何则可？”孟子对曰：“昔者大王居邠，狄人侵之，事之以皮币，不得免焉；事之以犬马，不得免焉；事之以珠玉，不得免焉。乃属其耆老而告之曰：‘狄人之所欲者，吾土地也。吾闻之也，君子不以其所以养人者害人。二三子何患乎无君？我将去之。’去邠，逾梁山，邑于岐山之下居焉。邠人曰：‘仁人也，不可失也。’从之者如归市。^①或曰：‘世守也，非身之所能为也，效死勿去。’^②君请择于斯二者。”^③

【注释】

①属，音烛。皮，谓虎豹麋鹿之皮也。币，帛也。属，会集也。土地本生物以养人，今争地而杀人，是以其所以养人者害人也。邑，

作邑也。归市，人众而争先也。

②又言或谓土地乃先人所受，而世守之者，非己所能专，但当致死守之，不可舍去。此国君死社稷之常法，传所谓国灭君死之，正也。正谓此也。

③能如大王则避之，不能则谨守常法。盖迁国以图存者，权也；守正而俟死者，义也。审己量力，择而处之可也。杨氏曰：“孟子之于文公，始告之以效死而已，礼之正也。至其甚恐，则以大王之事告之，非得已也。然无大王之德而去，则民或不从，而遂至于亡，则又不若效死之为愈，故又请择于斯二者。”又曰：“孟子所论，自世俗观之，则可谓无谋矣。然理之可为者，不过如此。舍此，则必为仪、秦之为矣。凡事求可，功求成；取必于智谋之末，而不循天理之正者，非圣贤之道也。”

【原文】

鲁平公将出，嬖人臧仓者请曰：“他日君出，则必命有司所之。今乘舆已驾矣，有司未知所之，敢请。”公曰：“将见孟子。”曰：“何哉？君所为轻身以先于匹夫者？以为贤乎？礼义由贤者出，而孟子之后丧逾前丧，君无见焉！”公曰：“诺。”①乐正子入见，曰：“君奚为不见孟轲也？”曰：“或告寡人曰：‘孟子之后丧逾前丧。’是以不往见也。”曰：“何哉？君所谓‘逾’者，前以士，后以大夫。前以三鼎，而后以五鼎与？”曰：“否。谓棺槨衣衾之美也。”曰：“非所谓逾也，贫富不同也。”②乐正子见孟子，曰：“克告于君，君为来见也。嬖人有臧仓者沮君，君是以不果来也。”曰：“行或使之，止或尼之。行止，非人所能也。吾之不遇鲁侯，天也。臧氏之子焉能

使予不遇哉？”^③

【注释】

①乘，去声。乘舆，君车也。驾，驾马也。孟子前丧父，后丧母。逾，过也。言其厚母薄父也。诺，应辞也。

②入见之“见”，音现。与，平声。乐正子，孟子弟子也，仕于鲁。三鼎，士祭礼。五鼎，大夫祭礼。

③为，去声。沮，慈吕反。尼，女乙反。焉，于虔反。克，乐正子名。沮、尼，皆止之之意也。言人之行，必有人使之者；其止，必有人尼之者。然其所以行，所以止，则固有天命，而非此人所能使，亦非此人所能尼也。然则我之不遇，岂臧仓之所能为哉？此章言圣贤之出处，关时运之盛衰，乃天命之所为，非人力之可及。

公孙丑章句上

【原文】

公孙丑问曰：“夫子当路于齐，管仲、晏子之功，可复许乎？”^①
孟子曰：“子诚齐人也，知管仲、晏子而已矣。”^②或问乎曾西曰：“吾子与子路孰贤？”曾西蹴然曰：“吾先子之所畏也。”曰：“然则吾子与管仲孰贤？”曾西赧然不悦曰：“尔何曾比予于管仲？管仲得君，如彼其专也；行乎国政，如彼其久也；功烈，如彼其卑也。尔何曾比予于是？”^③曰：“管仲，曾西之所不为也，而子为我愿之乎？”^④

曰：“管仲以其君霸，晏子以其君显。管仲、晏子，犹不足为与？”^⑤

曰：“以齐王，由反手也。”^⑥曰：“若是，则弟子之惑滋甚。且以文王之德，百年而后崩，犹未洽于天下。武王、周公继之，然后大行。今言王若易，然则文王不足法与？”^⑦曰：“文王何可当也？由汤至于武丁，贤圣之君六七作，天下归殷久矣，久则难变也。武丁朝诸侯有天下，犹运之掌也。纣之去武丁未久也，其故家遗俗，流风善政，犹有存者。又有微子、微仲、王子比干、箕子、胶鬲，皆贤人也，相与辅相之，故久而後失之也。尺地莫非其有也，一民莫非其臣也，然而文王犹方百里起，是以难也。”^⑧齐人有言曰：‘虽有智慧，不如乘势；虽有鎡基，不如待时。’今时则易然也。”^⑨夏后、殷、周之盛，地未有过千里者也，而齐有其地矣；鸡鸣狗吠相闻，而达乎四境，而齐有其民矣。地不改辟矣，民不改聚矣，行仁政而王，莫之能御也。”^⑩且王者之不作，未有疏于此时者也；民之憔悴于虐政，未有甚于此时者也。饥者易为食，渴者易为饮。”^⑪孔子曰：‘德之流行，速于置邮而传命。’^⑫当今之时，万乘之国，行仁政，民之悦之，犹解倒悬也。故事半古之人，功必倍之，惟此时为然。”^⑬

【注释】

①复，扶又反。公孙丑，孟子弟子，齐人也。当路，居要地也。管仲，齐大夫，名夷吾，相桓公，霸诸侯。许，犹期也。孟子未尝得政，丑盖设辞以问也。

②齐人但知其国有二子而已，不复知有圣贤之事。

③蹴，于六反。𨔵，音拂，又音勃。曾，并音增。孟子引曾西与或人问答如此。曾西，曾子之孙。蹴，不安貌。先子，曾子也。

艷，怒色也。曾之言则也。烈，犹光也。桓公独任管仲四十余年，是专且久也。管仲不知王道而行霸术，故言功烈之卑也。杨氏曰：“孔子言子路之才，曰千乘之国，可使治其赋也。使其见于施为，如是而已。其于九合诸侯，一匡天下，固有所不逮也。然则曾西推尊子路如此，而羞比管仲者，何哉？譬之御者，子路则范我驰驱而不获者也，管仲之功，诡遇而获禽耳。曾西，仲尼之徒也，故不管仲之事。”

④子为之“为”去声。曰，孟子言也。愿，望也。

⑤与，平声。显，显名也。

⑥王，去声。由、犹通。反手，言易也。

⑦易，去声，下同。与，平声。滋，益也。文王九十七而崩，言百年，举成数也。文王三分天下，才有其二。武王克商，乃有天下。周公相成王，制礼作乐，然后教化大行。

⑧朝，音潮。鬲，音隔，又音历。辅相之“相”，去声。犹方之“犹”，与由通。当，犹敌也。商自成汤至于武丁，中间太甲、太戊、祖乙、盘庚，皆贤圣之君。作，起也。自武丁至纣，凡九世。故家，旧臣之家也。

⑨耜，音兹。耜基，田器也。时，谓耕种之时。

⑩辟，与闢同。此言其势之易也。三代盛时，王畿不过千里，今齐已有之，异于文王之百里。又鸡犬之声相闻，自国都以至于四境，言民居稠密也。

⑪此言其时之易也。自文、武至此七百余年，异于商之贤圣继作；民苦虐政之甚，异于纣之犹有善政。易为饮食，言饥渴之甚，

不待甘美也。

⑫邮，音尤。置，驿也；邮，駟也：所以传命也。孟子引孔子之言如此。

⑬乘，去声。倒悬，喻困苦也。所施之事半于古人，而功倍于古人，由时势易而德行速也。

【原文】

公孙丑问曰：“夫子加齐之卿相，得行道焉，虽由此霸王不异矣。如此则动心否乎？”孟子曰：“否，我四十不动心。”①曰：“若是，则夫子过孟贲远矣。”曰：“是不难。告子先我不动心。”②曰：“不动心有道乎？”曰：“有。”③北宫黝之养勇也：不肤挠，不目逃，思以一毫挫于人，若挞之于市朝；不受于褐宽博，亦不受于万乘之君；视刺万乘之君，若刺褐夫；无严诸侯，恶声至，必反之。④孟施舍之所养勇也，曰：‘视不胜犹胜也；量敌而后进，虑胜而后会，是畏三军者也。舍岂能为必胜哉？能无惧而已矣。’⑤孟施舍似曾子，北宫黝似子夏。夫二子之勇，未知其孰贤，然而孟施舍守约也。⑥昔者曾子谓子襄曰：‘子好勇乎？吾尝闻大勇于夫子矣：自反而不缩，虽褐宽博，吾不憊焉；自反而缩，虽千万人，吾往矣。’⑦孟施舍之守气，又不如曾子之守约也。”⑧曰：“敢问夫子之不动心，与告子之不动心，可得闻与？”“告子曰：‘不得于言，勿求于心；不得于心，勿求于气。’不得于心，勿求于气；可。不得于言，勿求于心；不可。夫志，气之帅也；气体之充也。夫志至焉，气，次焉。故曰：‘持其志，无暴其气。’”⑨“既曰‘志至焉，气次焉’，又曰：‘持其志，无暴其气’者，何也？”曰：“志壹则动气，气壹则动志也。今夫蹶者、

趋者，是气也，而反动其心。”⑩

【注释】

①相，去声。此承上章，又设问孟子若得位而行道，则虽由此而成霸王之业，亦不足怪。任大责重如此，亦有所恐惧疑惑而动其心乎？四十强仕，君子道明德立之时。孔子四十而不惑，亦不动心之谓。

②贲，音奔。孟贲，勇士。告子，名不害。孟贲血气之勇，丑盖惜之以赞孟子不动心之难。孟子言告子未为知道，乃能先我不动心，则此亦未足为难也。

③程子曰：心有主，则能不动矣。

④黜，伊纠反。挠，奴效反。朝，音潮。乘，去声。北宫，姓；黜，名。肤挠，肌肤被刺而挠屈也。目逃，目被刺而转睛逃避也。挫，犹辱也。褐，毛布；宽博，宽大之衣，贱者之服也。不受者，不受其挫也。刺，杀也。严，畏惮也，言无可畏惮之诸侯也。黜盖刺客之流，以必胜为主，而不动心者也。

⑤舍，去声，下同。孟，姓；施，发语声；舍，名也。会，合战也。舍自言其战虽不胜，亦无所惧，若量敌虑胜而后进战，则是无勇而畏三军矣。舍盖力战之士，以无惧为主，而不动心者也。

⑥夫，音扶。黜务敌人，舍专守己。子夏笃信圣人，曾子反求诸己，故二子之与曾子、子夏虽非等伦，然论其气象，则各有所似。贤，犹胜也。约，要也。言论二子之勇，则未知谁胜；论其所守，则舍比于黜为得其要也。

⑦好，去声。惴，之瑞反。此言曾子之勇也。子襄，曾子弟子